



KENYATAAN MEDIA

18 Jun 2016

**PROGRAM SAHABAT SAHUR POTENSI JEJAK AGENSI KESELAMATAN
SELURUH NEGERI PERLIS**

Kangar, 18 Jun – Sempena bulan Ramadhan ini, Persatuan Pegawai Tadbir dan Ikhtisas (POTENSI) Universiti Malaysia Perlis (UniMAP) menganjurkan kunjungan mesra ke beberapa agensi keselamatan di seluruh negeri Perlis dan jejak ukhwah keluarga kakitangan UniMAP yang telah meninggal dunia.

Naib Canselor UniMAP Dato' Prof Dr Zul Azhar Zahid Jamal melahirkan ucapan tahniah dan syabas di atas usaha POTENSI yang prihatin bagi menghargai anggota agensi keselamatan di negeri ini yang bertugas 24 jam bagi memastikan keselamatan negara.

“Antara agensi keselamatan yang dikunjungi ialah Jabatan Pertahanan Awam Kangar, Jabatan Bomba dan Penyelamat Kangar, pos-pos keselamatan UniMAP, pos-pos sempadan serta Ibu Pejabat Polis Daerah (IPD).

“Selain itu, jejak ukhwah ke rumah keluarga kakitangan UniMAP yang meninggal dunia juga menunjukkan objektif yang jelas POTENSI dalam program Sahabat Sahur ini sebagai tanda keprihatinan kepada keluarga berkenaan,” katanya ketika melancarkan Program Singgah Sahur dan Jejak Ukhwah, di sini hari ini.

Hadir sama Timbalan Naib Canselor Hal Ehwal Pelajar dan Alumni (HEPA) UniMAP Prof Madya Dr Mohd Foad Sakdan dan Pendaftar UniMAP Encik Zuber Hj Mohamad.

Program Singgah Sahur POTENSI ini merupakan anjuran kali ketiga turut mengedar juadah bersahur kepada anggota agensi keselamatan dengan disertai hampir 20 orang ahli jawatankuasa POTENSI diketuai Encik Rusdi Puteh selaku Presiden POTENSI dan kakitangan teknikal serta keselamatan UniMAP.

Sementara itu, ketika program Jejak Ukhwah di rumah keluarga kakitangan kolej kediaman UniMAP Allahyarham Haslina Ismail, Zul Azhar dan POTENSI meluangkan masa beramah mesra dengan anak-anak Allahyarham yang berusia dari 11 tahun hingga 1 tahun.

Suami Allahyarham, Muswadi Musa berkata semenjak kematian isterinya anak-anak yang masih kecil dijaga oleh ibu dan kakaknya apabila beliau pergi bekerja sebagai penghantar kurier di sebuah syarikat kurier di bandar ini.

“Sekiranya mahu dihantar pengasuh, mungkin membabitkan kos justeru saya terpaksa mengharap ihsan ibu dan kakak saya bagi menjaga anak-anak yang masih kecil sementara yang masih bersekolah saya terpaksa berulang alik dari tempat kerja bagi menghantar serta menjemput mereka.

“Kehadiran pengurusan tertinggi UniMAP serta POTENSI pada malam ini meninggalkan kesan yang mendalam di hati kami sekeluarga kerana UniMAP masih prihatin dengan keluarga kami walaupun isteri saya sudah tiada,” katanya.

Program Singgah Sahur yang bermula jam 11 malam semalam berakhir jam 5 pagi hari ini dengan destinasi terakhir di pos keselamatan UniMAP Kampus Tetap Pauh Putra.

Dikeluarkan Oleh :

Aininulniza Mohd Yusof (aininulniza@unimap.edu.my)

Pegawai Perhubungan Media UniMAP